

SL(5)365 - Rheoliadau Gwasanaethau Rheoleiddiedig (Darparwyr Gwasanaethau ac Unigolion Cyfrifol) (Cymru) (Diwygio) 2019

Cefndir a Diben

Mae'r Rheoliadau hyn yn diwygio Rheoliadau Gwasanaethau Rheoleiddiedig (Darparwyr Gwasanaethau ac Unigolion Cyfrifol) (Cymru) 2017 ("**Rheoliadau 2017**"). Mae Rheoliadau 2017 yn nodi'r gofynion rheoleiddiol sy'n gymwys i ddarparwyr gwasanaethau penodol sy'n cael eu rheoleiddio o dan Ddeddf Rheoleiddio ac Arolygu Gofal Cymdeithasol (Cymru) 2016 (**Deddf 2016**). Y rhain yw gwasanaethau cartrefi gofal, gwasanaethau llety diogel, gwasanaethau canolfannau preswyl i deuluoedd a gwasanaethau cymorth cartref.

Mae'r diwygiadau yn cynnwys:

- Mae rheoliad 4 yn gwneud nifer o ddiwygiadau i reoliad 2 o Reoliadau 2017 sy'n ymdrin ag amgylchiadau pan fo person wedi ei esemptio o'r gofyniad i gofrestru fel darparwr gwasanaeth cartref gofal.
- Mae rheoliad 5 yn diwygio rheoliad 3 o Reoliadau 2017 i bennu nad yw gofal nyrsio a ddarperir gan nyrs gofrestrdedig yn dod o fewn cwrpas gweithgaredd gwasanaeth cymorth cartref.
- Mae rheoliad 8 yn ychwanegu gofyniad at reoliad 28 o Reoliadau 2017 ynghylch polisi a gweithdrefnau darparwr gwasanaeth ar gyfer cynilion plant.

Gweithdrefn

Cadarnhaol.

Materion technegol: craffu

Ni nodwyd unrhyw bwyntiau i gyflwyno adroddiad arnynt o dan Reol Sefydlog 21.2 mewn perthynas â'r offeryn hwn.

Rhinweddau: craffu

Nodwyd dau bwynt i gyflwyno adroddiad arnynt o dan Reol Sefydlog 21.3 mewn perthynas â'r offeryn hwn.

1. Rheol Sefydlog 21.3(ii) – ei fod o bwysigrwydd gwleidyddol neu gyfreithiol neu ei fod yn codi materion polisi cyhoeddus sy'n debyg o fod o ddiddordeb i'r Cynulliad.

Gwneir y Rheoliadau hyn yn rhannol o dan adran 27 o Ddeddf 2016. Mae adran 27(4) o Ddeddf 2016 yn ei gwneud yn ofynnol i Weinidogion Cymru ymgynghori cyn gwneud rheoliadau o dan adran 27 ac mae'n ei gwneud yn ofynnol iddynt **gyhoeddi** datganiad am yr ymgynghoriad. At hynny, mae adran 27(5) yn ei gwneud yn ofynnol i Weinidogion Cymru osod **copi** o'r datganiad cyhoeddiedig hwnnw gerbron y Cynulliad.

Hyd y gwyddom, nid oes copi o ddatganiad o'r fath wedi'i osod gerbron y Cynulliad. Nodwn fod y Memorandwm Esboniadol yn darparu linc at grynodedb o ymatebion i'r ymgynghoriad ond nid yw darparu linc at ddogfen yn gyfystyr â gosod dogfen gerbron y Cynulliad.



Rydym yn cydnabod nad yw adran 27 o Ddeddf 2016 yn nodi pryd y mae'n rhaid gosod copi o'r datganiad cyhoeddus gerbron y Cynulliad, ond byddem yn disgwyl iddo fod wedi cael ei osod yr un pryd ag y gosodwyd y Rheoliadau drafft er mwyn i'r Pwyllgor hwn a'r Cynulliad gael gwybodaeth cyn y ddadl a'r bleidlais yn y Cyfarfod Llawn - credwn mai dyna oedd bwriad y Cynulliad pan gymeradwyodd Ddeddf 2016, gan gynnwys adran 27(5).

Byddem yn croesawu eglurhad gan Lywodraeth Cymru ynghylch pryd y caiff copi o'r datganiad cyhoeddus ei osod gerbron y Cynulliad.

2. Rheol Sefydlog 21.3(ii) – ei fod o bwysigrwydd gwleidyddol neu gyfreithiol neu ei fod yn codi materion polisi cyhoeddus sy'n debyg o fod o ddiddordeb i'r Cynulliad.

Mae'r Rheoliadau drafft hyn yn ddarostyngedig i weithdrefn penderfyniad cadarnhaol, sy'n golygu na ellir eu gwneud (hynny yw, eu llofnodi) oni bai bod y drafft wedi'i gymeradwyo gan y Cynulliad.

Mae'r cymal llofnodi yn cynnwys enw teipiedig y Dirprwy Weinidog Iechyd a Gwasanaethau Cymdeithasol (Julie Morgan) a fydd yn gwneud y Rheoliadau hyn. Er ein bod wedi cael cadarnhad nad yw'r Rheoliadau drafft wedi cael llofnod yn llaw'r Dirprwy Weinidog, credwn ei fod yn arfer deddfwriaethol da i beidio â chynnwys enw (hyd yn oed enw wedi'i deipio) yng nghymal llofnodi is-ddeddfwriaeth ddrafft, er mwyn osgoi unrhyw awgrym bod y drafft wedi cael ei lofnodi.

Nodwn fod hyn wedi digwydd mewn sawl darn o is-ddeddfwriaeth ddrafft yn ddiweddar. Felly, byddem yn croesawu eglurhad gan Lywodraeth Cymru pam mae enw wedi'i deipio wedi'i gynnwys (pan na fu'n arferiad i wneud hynny mewn is-ddeddfwriaeth ddrafft yn y gorffennol).

Y goblygiadau yn sgil gadael yr Undeb Ewropeaidd

Ni nodwyd unrhyw bwyntiau i gyflwyno adroddiad arnynt o dan Reol Sefydlog 21.3 mewn perthynas â'r offeryn hwn.

Ymateb y Llywodraeth

Mewn cysylltiad â'r gofyniad o dan adran 27(5) o Ddeddf 2016, mae Llywodraeth Cymru bellach wedi gosod y datganiad ynghylch yr ymgynghoriad gerbron y Cynulliad, cyn i'r Rheoliadau gael eu trafod yn y Cyfarfod Llawn ar 26 Mawrth ac, os cânt eu pasio, eu gwneud gan y Dirprwy Weinidog. Gellir gweld hyn ar: <http://www.assembly.wales/laid%20documents/gen-ld12401/gen-ld12401-w.pdf>.

Mae Llywodraeth Cymru yn nodi sylwadau'r cynghorydd cyfreithiol ar gynnwys enw'r Dirprwy Weinidog yn y drafft o'r offeryn statudol a osodwyd gerbron y Cynulliad. Nid ydym yn cytuno bod hyn yn newid arfer. Rydym wedi edrych ar offerynnau drafft blaenorol sydd wedi eu gosod ac wedi gweld bod hyn wedi digwydd yn weddol reolaidd dros nifer o flynyddoedd heb sylw. Fodd bynnag, er mwyn osgoi unrhyw amheuaeth o ran statws offeryn, bydd Llywodraeth Cymru yn sicrhau nad yw enwau yn cael eu cynnwys mewn offerynnau drafft a osodir yn y dyfodol.

Trafodaeth y Pwyllgor

Trafododd y Pwyllgor yr offeryn, ynghyd ag ymateb y Llywodraeth, yn ei gyfarfod ar 18 Mawrth 2019 ac mae'n cyflwyno adroddiad i'r Cynulliad yn unol â'r pwyntiau adrodd rhinweddau uchod.

